

8. gr.

Vistun unglings lýkur þegar forstjóri og/eða barnaverndarnefnd ákveður að vistunar er ekki lengur þörf. Skal gerð skýrsla um dvöl unglingsins, svo og leiðbeiningar um framhalds- aðstoð, ef æskileg er talin. Skal hún send hlutaðeigandi barnaverndarnefnd.

9. gr.

Rekstrarkostnaður Unglingaheimilis ríkisins greiðist úr ríkissjóði.

10. gr.

Forstjóri Unglingaheimilis ríkisins skipuleggur, í samráði við deildarstjóra, fræðslu og samskiptanámskeið fyrir starfsfólk eigi sjaldnar en einu sinni á ári hverju.

11. gr.

Reglugerð þessi er sett á grundvelli laga nr. 58/1992 um vernd barna og ungmenna og öðlast þegar gildi. Jafnframt fellur úr gildi reglugerð nr. 467/1989 um Unglingaheimili ríkisins.

Félagsmálaráðuneytið, 5. janúar 1993.

Jóhanna Sigurðardóttir.

Pórhildur Líndal.

SKIPULAGSSKRÁ

fyrir sjálfseignarstofnun Dvalarheimilis aldraðra heyrnarlausra.

1. gr.

Félag heyrnarlausra og Kirkja heyrnarlausra stofna hér með sjálfseignarstofnun sem ber nafnið Dvalarheimili aldraðra heyrnarlausra. Heimili og varnarþing stofnunarinnar er í Reykjavík.

2. gr.

Stofnfé er kr. 420 000, –fjögur hundruð og tuttugu þúsund– og skiptist það þannig að Félag heyrnarlausra leggur fram kr. 270 000 og Kirkja heyrnarlausra kr. 150 000. Stofnfé má ekki skerða.

3. gr.

Eignir stofnunarinnar eru, ásamt stofnfé, þau framlög í reiðufé og öðrum verðmætum, sem berast og safnað verður til umönnunar aldraðra á Dvalarheimili aldraðra heyrnarlausra. Skuldir eru engar. Stofnendur bera engar fjárhagslegar skuldbindingar vegna sjálfseignarstofnunarinnar.

4. gr.

Tilgangur stofnunarinnar er að veita öldruðum heyrnarlausum heimilisvist og aðhlynningu á dvalarheimili, svo sem mögulegt er.

Í þessu skyni veitir stofnunin viðtöku gjöfum og hvers konar styrktarfé.

5. gr.

Peningar þeir sem stofnunin eignast skulu jafnóðum ávaxtaðir í bönkum, sparisjóðum eða ríkistryggðum skuldabréfum. Tekjum stofnunarinnar skal einungis ráðstafað til starfsemi sem samrýmist markmiðum hennar skv. 4. gr.

6. gr.

Stofnunin rekur dvalarheimili fyrir aldraða heyrnarlauslausa að Vesturhlíð í Reykjavík. Þeir einir eiga rétt til vistunar á dvalarheimilinu, sem eru heyrnarlausir og hafa náð 67 ára aldri.

7. gr.

Stjórn stofnunarinnar skipa þrír menn og jafnmargir til vara. Tveir stjórnarmenn og tveir til vara skulu skipaðir af Félagi heyrnarlausra og einn stjórnarmaður og einn til vara af Kirkju heyrnarlausra. Stjórnarmenn skulu skipaðir til tveggja ára í senn. Ávallt skal boða varamenn til stjórnarfunda og hafa þeir málfrelsi og tillögurétt. Stjórnin skiptir með sér verkum.

Stjórn stofnunarinnar skal tilkynna sjóðaskrá hverjir skipi stjórn hverju sinni, sbr. 2. mgr. 3. gr. l. nr. 19/1988.

8. gr.

Aðalfund stofnunarinnar skal halda fyrir 30. júní ár hvert. Stjórn stofnunarinnar hefur ein atkvæðisrétt á aðalfundi. Á aðalfundi hafa auk stjórnar stofnunarinnar rétt til setu þrír fulltrúar frá Félagi heyrnarlausra, tilnefndir af stjórn Félags heyrnarlausra og einn fulltrúi frá Kirkju heyrnarlausra, tilnefndur af Kirkju heyrnarlausra. Formaður stjórnar boðar til aðalfundar með 14 daga fyrirvara hið minnsta. Ákvarðanir aðalfundar eru aðeins lögmæt, að meirihluti stjórnar sé á fundi eða varamenn þeirra.

9. gr.

Allir stjórnarmenn geta boðað til stjórnarfunda, enda tilgreini þeir fundarefni. Stjórnarfundi skal boða með minnst 3ja daga fyrirvara og er fundurinn lögmætur ef meiri hluti stjórnar mætir. Halda skal fundargerðarbók um það sem gerist á fundum og skulu allir stjórnarmenn sem á fundi eru undirrita fundargerðina. Þeim stjórnarmönnum sem ekki eru á fundi skal senda afrit fundargerða.

Allar ákvarðanir stjórnar verða að samþykkingast af meirihluta hennar. Þó þarf samþykki allra stjórnarmanna til allra meiri háttar fjármálalegra ákvarðana.

10. gr.

Reikningsár stofnunarinnar er almanaksárið. Ársreikningar hennar skulu endurskoðaðir af löggiltum endurskoðanda og síðan lagðir fyrir stjórnina til samþykktar á aðalfundi. Eigi síðar en 30. júní ár hvert skal stjórnin senda Ríkisendurskoðun ársreikning stofnunarinnar fyrir næst liðið ár ásamt skýrslu um hvernig fjármunum hennar var ráðstafað á því ári.

11. gr.

Stjórn stofnunarinnar ræður forstöðumann fyrir dvalarheimili stofnunarinnar, sem annast allan daglegan rekstur þess í samráði við stjórnina. Forstöðumaður skal vera gjaldkeri stofnunarinnar og er hann vörsluaðili sjóða hennar og sinnir skrifstofuhaldi sem rekstri fylgir. Forstöðumaður hefur prókúru fyrir stofnunina. Stjórnin ræður annað starfsfólk eftir þörfum og segir því upp. Ber henni að gera sér allt far um að efla hag og heill stofnunarinnar í öllum greinum, og auka hana og stækka, ef þörf krefur og kringumstæður leyfa.

Stjórn stofnunarinnar setur reglur fyrir dvalarheimilið.

12. gr.

Eigi má selja eða veðsetja fasteignir er stofnunin á eða kann að eignast nema að fengnu samþykki dómsmálaráðherra. Sömuleiðis er óheimilt að selja eða láta af hendi aðrar eignir stofnunarinnar, hverju nafni sem nefnast, nema þeim verði varið til að halda áfram sams konar rekstri.

13. gr.

Komi að því að stjórnin sjái sér ekki fært að reka stofnunina áfram, skal, í samráði við dómsmálaráðuneytið sbr. 6. gr. l. nr. 19/1988, jafnan óska þess að einhverjum stofnaðila verði gefinn kostur á að taka við henni og rekstri hennar, enda verði hlutverk stofnunarinnar óbreytt.

14. gr.

Skipulagsskrá þessari verður ekki breytt né stofnunin lögð niður nema a.m.k. tveir stjórnarmenn samþykki ásamt samþykki dómsmálaráðuneytisins sbr. 3. mgr. 6. gr. l. nr. 19/1988.

Leita skal staðfestingar dómsmálaráðherra á skipulagsskrá þessari og breytingum sem á henni kunna að verða gerðar.

Svo samþykkt á stofnfundi Dvalarheimilis aldraðra heyrnarlausra þann 11. september 1992.

F.h. Félags heyrnarlausra
Anna Jóna Lárusdóttir.
Vilhjálmur G. Vilhjálmsson.
Gunnar Arnarsson.

F.h. Kirkju heyrnarlausra
Hervör Guðjónsdóttir.
Miyako Þórðarson.
Anna Jóna Lárusdóttir.

Skipulagsskrá þessi staðfestist hér með samkvæmt lögum um sjóði og stofnanir sem starfa samkvæmt staðfestri skipulagsskrá, nr. 19/1988.

Dóms- og kirkjumálaráðuneytið, 7. janúar 1993.

F. h. r.
Þorsteinn Geirsson.

Fanney Óskarsdóttir.